



謹齋詩稿

淮海 許志進

戊戌年下

江行二首

孤艇駛明流烟嵐浩不收遠天青入鏡客意淡於秋
薺樹仍瓜步雲山又蔣州飄飄吾自哂狎浪比沙鷗
秋色動晴江天風送碧艫洩雲留竹塢飛翠掠船窓斷
續笛三弄沉浮鳥一雙棲霞看近遠登涉興難降

過燕子磯

十里望空翠寒松老一峰江聲流六代秋色冷千重憶

坐孤亭月遙聽何處鐘今宵石城泊風露夢扶筇

望弘濟寺

佛子臨江宅青厓白石嵌風濤搖殿閣嵐翠鎖松杉浩劫論人代浮生趁客帆上方鐘梵晚賒月踏巉巖

題弘濟寺壁因懷高亭

崩厓路轉石門西開鑿何年洞壑迷風蹴寒濤臨絕壁月明秋磬出丹梯名山乞與禪關在勝地難銷俗筆題恨不與君同着句便攜襍被宿招提

入港

瞥眼千巖走排空一壁橫雲嵐交不斷風浪怒猶爭灘

落蘆根出峰迴晚照明深秋蕭瑟意吟望旅人情

十六夜江上玩月

晴空今夕淨浮烟弄影澄江獨叩舷傷岸潮痕三尺淺依船月魄十分圓宮袍醉客分良夜玉笛凌風說往年遙憶鄜州虛幌外清輝香霧不成眠

題吳家河房壁二首

碧檻疎簾水閣平七年前度繫離情風條嫋嫋臨河柳無復新鶯姪姹聲

一月傷春病不辭夕陽樓畔好花枝等閒零落秋風裏結子成陰又幾時

河亭雜詩三首

潮平碕岸綠差差披拂垂楊浣碧絲砧杵晚涼天似水
家家秋色映疎籬

利涉橋邊燈影滅桃葉渡頭歌管歇水窗涼露欲沾衣
獨倚危欄對秋月

玉雪清歌倚洞簫畫船風送輟蘭橈月明人醉三更夜
正及秦淮大信潮

感舊

新聲珠貫舊曾耽水榭風簾接笑談老去春游遲杜牧
重來白髮認何戡玉簫倚月憐嬌小羅幄留燈耐點慙

離恨綿綿消息斷後期思緒比吳蠶

金陵酬友二首

秋帆如放剡溪舟乘興還成白下游六代青山羈客路
三分明月大江流烟霞痼入詞人癖文酒耽爲地主留
舊欲移家向巖壑買山未敢薄巢由

自是嶽崎落拓身懶將野服問通津江山有約攜遊屐
風月相邀見故人鍾阜白雲筇杖晚石城秋寺蹇驢頻
踈狂於物無苛禮免使公孫惱惡賓

贈羅同年二首

尚齒耆英長非熊渭水師官貧仍首着耳重學龔癡明

月烏飛夜空堂燕去時

時水西門舊宅
已屬他人矣

人生如寄耳寧問艸

堂贊

五畝思文靖槐廳改綠莎賓朋翟尉少婚嫁尚平多共
醉丹陽酒還徵玉樹歌餘年且為樂風月滿行窩

館王季子家園因贈二首

節越綏猷保傅家翩翩文采屬蘭芽江東賜第優元老
舍北開園領物華鄴架芸香裊弓劍潘輿花徑擁笄珈
繞籬秋色供吟賞竹韻松風入煮茶

花滿園林書滿牀何如六岳大功坊地因名德傳文靖
人以清才識季方此日留賓先下榻他時拜母一登堂

只慚截髮勞深歎自哂迂疎非杜房

移榻湧翠西軒夜和壁間文待詔韻

名園樹石愜幽懷髣髴當年畫舫齋聒耳秋聲眠不得
柳風蕉雨響空階

夜檢王少保西征事略感興二首

玉關戰略入奇懷長夜青燈閉小齋四郡三城非異事
有苗干羽格堯階

燕頷雄姿感壯懷低迷如禁太常齋若焚硯筆親戎馬
未老還堪進幾階

秋日招同時先駿公次尹幼涵枚長定力讌集金

老水榭聽歌感舊四首

白下西風八月天
桂花深處集羣賢
而今白髮晨星侶
水榭追歡倍惘然

檀板芳尊娛老輩
清詞麗句樂新知
秦淮風月還如舊
消得劉郎幾度詩

玉樹歌長浩月中
主人老矣客秋蓬
酒酣更話旗亭事
腸斷當年盛小叢

舊苑東頭水木華
名香愛看石城花
重來儻得青溪宅
鄰比南朝江令家

贈駿公二首

賈馬聲華輦下知
空煩屈首作經師
江山文藻爭雄日
沙磧弓刀校獵時
進學解成人已老
離騷註就髮如絲
秦淮此日風烟改
倚醉燒燈一賦詩

鍾阜雲開曉日團
秋齋首着共闌干
敬亭山色多時夢
國子先生一味寒
三段碑殘貧可搨
九師易在老猶看
聖朝稽古徵遺逸
車服桓榮是執官

題秦淮水亭壁

淮畔秋深水榭清
晚涼風露倚欄情
山川自是金湯地
歌吹依然玉樹聲
梁燕幾更春社宅
燈船豔說麗人名
南朝舊事空潮汐
一片寒雲過石城

曾係成添

清麗出閒涼
情人時吟心

說列數設著

雲流湘水清

戊戌年稿下

文藪太守邀同子來觀察以正水曹尚恭司馬夜
飲即席贈施陳二子

文酒清娛性所耽
竭來虛領醉鄉銜
齊梁地古徐丘壑
竹肉音和辨雅南
玉樹連枝人似一
黃鸝雙語月疑三
彭宣未哂安昌放
名彥追歡儘自堪

時先宅上聽歌贈客二首

一髮清音脫口輕
管簫唇齒聽分明
白門老輩多名彥
吳下歌兒失後生
麴部招歡逢暇日
永和舊侶屢離情
白頭相聚秦淮水
卅載重尋鷗鷺盟
磊塊難平借酒澆
先生老矣興還饒
清商韻叶流纖管

冷板歌長引洞簫
心醉幾人忘白髮
秋深中夜夢仙韶
柯亭舊有孤生竹
乞與中郎手一調

時以名簫
一枚為贈

賦得疎雨滴梧桐

鹿山觀察試士題
用試帖體十二韻

漠漠清宵雨瀟瀟
拂井桐秋聲疎密裏
涼氣淺深中
暗響遲遙滴輕陰
切太空擣衣和砧杵
泣露語階蛩客夢
醒江館鄉思掠塞鴻
濕應低亞竹濃定染高楓
把酒聽來淡援琴寫未工
長更傳地籟幾葉墮
吳宮鳴劔多時澀
寒缸作意紅喜心生
見獵角技笑雕蟲
香篆僧樓寂宮雲禁苑同
西風搖落恨點點壯懷通

客夜有憶二首

疎雨寒花小苑中
薄遊情緒感秋蓬
玉鈎又見天西月
斟酌愁思語斷鴻

江城秋老詠歸歟
鄰舍兒郎夜讀書
遙夜篝燈憐驥子
比來清課定何如

贈次尹同年

隴阪歸來宦橐虛
蕭齋圖史伴閒居
秦山跋馬空懷古
江月窺人自讀書
問字生徒憑載酒
受經兒子亦將車
清尊相對俱頭白
耳熱論文更起余

城南紀游因贈無學閣黎

清秋美風日
籃輿恣游行
岡阜繞城南
林巒爭送迎
併

力窮一面杖
屢凌崢嶸嶺
蕭蕭風吹衣
松韻流竽笙
孤亭懸木末
花雨荒臺平
登眺俯萬有
衆壑收陪京
江流自天地
襟帶仍巖城
塔勢聳高標
金碧眩目睛
菟莪四百寺
臺殿何縱橫
感歎憶舊游
興廢空餘情
可憐閱人代
劫運移前明
誰言初地幽
散收兼幽并
流連雲公房
茶話同淒清

遊天界寺蒼翠菴贈雲上人

高松敞天界
蒼翠羣山囿
森森競奇古
龍虬互奔鬪
白雲翳荆扉
寒濤響清晝
初聞鳥可言
乃自僧離秀
堂開空翠裏
几榻明窗牖
駢羅翰墨林
行楷雜篆籀
師學已

透宗鑒賞當不謬坐詠棲霞作恍躡雲嵐岫如何閉一
室禪病維摩邁閣黎小鷲子引我捷猿狖縱步杉篁窟
側身烟羅竇僧房處處幽萬厦前朝構我來看丹楓正
及秋深候登高面江流晴巒簇衆皴遠近煩拍點莽蒼
失巖目殷勤一茶話欲別意良厚城南精藍藪每恨足
目漏更擬攬襟來托宿禪關又狂吟弄墨華淋漓染衫
袖丈室一燈明還向杼山叩

普德寺松

城南廢寺枕崇岡遺像仍開寶志堂惟有老松三十樹
獨留寒翠閱興亡

聽韻師琴和韻

青山帶秋寺積翠橫案几散步出林松蒼濤瀉流水了
知高山意清響非絃指四座寂無聲神凝官爲止移情
滄海上古有成連子無意得琴聰幽探恰方始禪關楓
瑟瑟落葉盈階祀和平非攫抑俗物寧諳此紛紛箏琶
兒試洗囂塵耳

和志山不寐韻

無寐當秋夜羈人酒易消素心堪共語高館恰相招聽
竹知風勁聞鐘覺寺遙老懷澄似水得句起侵朝

和志山留宿寓齋韻因懷先處士

秋齋剪燭共論詩二十餘年慰所思意得不妨三語少
名高且有一人知酒醒客被孤眠夜雁度江城落葉時
何日追陪成結襪先生老矣鬢如絲

寄人二首

曾對冰輪詠碧雲別來絲緒日紛紛江城旅館荒砧夜
孤夢悠悠獨爲君

最憶清羸病未瘳可堪秋夜屢離愁蟹肥菊綻重陽近
定強登高望遠遊

郭氏二姬二首

有序

志山語我郭先生天中字聖僕白下者舊也性高潔善草隸書茶
竈筆林事事精雅晚蓄朱李二姬色藝雙美朱字玉耶善畫蘭李

字陀那善畫水仙好事者多得其蹟先生
既老擇二少年贈之余豔其事爲賦二詩

暖老明妝活玉姿蘭閨香潔畫蘭時先生可是無情思
忍爲楊枝詠別詩

自寫陀那小洛神歲寒風格一枝春宓妃嫁後空鴛枕
惆悵陳思夢裏身

重九前二日偕枚長遊雞鳴清涼諸勝薄暮冒雨
而歸因用紀伯紫韻四首

肩輿竹杖肯辭勞人境空虛且自逃天半晴陰宜着屐
路穿雲壑當登高菊邊茶社鐺相借花下羹湯釜漫輶
賴有閒情
痼癖竭來終日訪林

霜老芙蓉處處秋林塘僧舍總清幽山川雲樹全含雨
樓閣風簾半上鈎行憶鶯花三月路坐銷金粉六朝愁
興亡事休重語對此惟堪大白浮

清涼草色冷粲粲江水寒雲落日邊十廟斷碑餘此地
九畿開國忘何年捨身漫說臺城寺選勝還尋小有天
上罷雞籠山絕頂孝陵松柏起昏烟

綠淨秋山不染塵幽探到處得閒身不將名姓留空谷
那向園亭問主人節近重陽定風雨人懷舊侶記庚辛

謂師晦題山
又航諸同年

重來更結看花約買宅烏龍潭水濱

雞鳴山絕句八首

元武湖邊秋水寒雞鳴山色足孱顏齊梁往事難回首
樓閣崢嶸萬歲山

原廟衣冠罷月遊凌烟遺像自千秋酒旗戲鼓風流地
依舊年年賽蔣侯

九廟何妨祀麩牲志公高閣在臺城秋花孃孃蜂如蟻
知是蜂王釀蜜成

元武樓空列御亭多時太史罷占星臺前華表聞人語
似有飛來鶴姓丁

會稽要是勾吳鹵江左終爲蜀漢讐不識三高祠少伯
何如十廟享關侯

百神牲幣明禋日五時春秋祿獻時若毀淫祠嚴義例
獨留蔣卞兩三祠

水芙蓉外木芙蓉秋老江南景色濃虎踞關前尋菊路
桂花楓葉幾千重

北山竟日望雲嵐薄暮維摩借一龕却笑攢眉廬岳客
佛燈僧梵古林菴

黃侍中祠

能追方景烈最數侍中妻城闕殘飛燕雲山怨碧雞徵
兵謀復楚刎頸報亡齊片石青溪血千年影不迷

酬志山見懷二首

侵尋小疾倏移時欹枕吟君細字詩七發枚生期作健
四愁平子本多思雲凝翠黛山痕瘦秋染丹楓葉脫遲
為報重陽今日是可堪辜負菊花枝

幾為幽憂賦索居登高訪古興成虛堂空縱覽摩崖帖
睡足閒繙插架書

時朱公子贈以唐帖
王公子借以藏書

南郭題鮫名士社東

籬采菊隱人廬何當藥物兼萸酒客病秋懷兩破除

覲面二首

覲面新妝已目成盈盈姿態記分明文園正有傷秋病
一笑臨風覺體輕

解珮江臯締夙緣宜男預算小行年桃根一夕關情思

夜雨燈花作意圓

怊悵

怊悵江東一月遊每因見月憶鄜州北山猿鳥留逋客
南國妝梳愛莫愁九日懷鄉還病酒五更殘夢獨傷秋
藁砧天鏡煩清詠莫向溝流歎白頭

客夜懷仲掄

過雨初寒夜無風月更明低迷孤夢遠偃仰敝袍輕霜
氣侵窗紙雞聲入戍鉦惠連池草詠期爾到江城

不寐

新寒侵薄衾淺睡艱倦睫瞑眩辭病魔風雨過殘劫檻

竹故蕭蕭高楓仍獵獵稍嫌秋夜長引我離愁疊不知
苔砌下堆積幾何葉征雁何迢迢斷續聲相接默念時
序改敝緼增重袷風人感授衣摻摻思熨貼霜月透重
雲照我牀頭缺起坐激悲吟疎更送城堞

西楚霸王廟和時先

名姬駿馬霸圖終不獨鴻溝半壁空誰道繡衣歸暮夜
空留祠廟向江東潮聲不盡陰陵恨山色依然九里雄
欲作楚歌先灑淚真成杜默哭西風

禹陵和荻江

孰帛塗山歲已深會稽遺墓久銷沉九州玉食蒸民粒

八載黃熊孝子心泗水鼎淪何代出洞庭書在幾人尋
橋陵弓劒蒼梧淚江漢東流自古今

訪志山郊居和其初度酬友十二首韻奉贈

荆扉竟日掩蒿萊蔣徑聊因好客開
禿筆幾看求字去解頤特爲說詩來
簾前石鼎依塵榻檻外秋花覆老苔
落落鬢眉人自古不將時事入驚猜

他時曾誦幾篇詩耆舊無多握手遲
妙理須從禪悟入清機那得俗人知
談深晉宋中間事考徧周秦上代碑
我欲携尊頻問字晦明風雨訂心期

鄉里從知號彥方酒杯詩律鬪清狂
藥無二價韓康市

檻有三年杜甫堂五十過頭諸事懶
百年強半笑人忙故侯我亦相忘久
往事無煩問子桑

詩病求醫去故方偏師徑可挫
文房南山不獻周郎誚北面初登鄭氏堂
與我周旋猶自嬾因人作熟肯成忙
新篇往往多懷古六代興亡自建康

齊梁風物尚繁華浩劫依稀又幾家
舟渡一龍虛晉馬歌殘三閣失陳花
江山秋色居然老萬古閒愁祇自賒
靜者之居深閨寂笑談容我一謹譁

備春織履自清操老去幽人只布袍
物外營巢寄蚊睫世間未利付龜毛
虛名要使傳千載俗念何曾雜一毫

惟有淵明知此意莫將詩句比劉曹

和靖山居合種梅古香深護短籬開携觴客許探春入
放鶴船教載月來斜日蹇驢靈谷寺秋風紅樹雨花臺
闕闕緇笠成來往便是胡僧話劫灰

身世何煩問六如但猶著意即拘迂生天且自饒諸慧
佞佛真堪笑一無何肉周妻娛暮景桐花竹實長鷓雛
老人泉畔人俱老有子才名擬大蘇

自是幽人事事幽更無榮辱更無愁攤書意得呼兒語
搖膝吟酣待客酬養大稚松留海鶴種成高竹起山樓
由來野老多眉壽八十從他雪滿頭

年年草木任枯榮耄叟

知世上情敝帚自珍蟲鳥跡

殘編空照雪螢明也嗤造化私遺老獨對江山愛晚晴
繞郭南朝三百寺雲巖聽徹曉鐘聲

爬梳金石字紛然篆籀斯邕次第詮石鼓文殘搜斷缺
落星碑在考旁偏頤生藥籠渾忘老高枕書巢不愛錢
最是吟成須自惜隱君詩集待誰編

老來追憶平生友七十餘年幾輩真畫字取償沽酒債
鈔詩獨載素心人耆英舊侶寥寥社安樂行窩日日春
和得新篇成一笑真成白首訂交新

絃索調行

嘈嘈切切琵琶聲十三雁柱調秦箏別有三絃相和鳴
里歌巷曲音響清啞能傳兒女情邊關調古哀怨生
秦聲烏烏厭人聽誰教此曲侑杯鐺京華記合簫琴笙
癸已在京師有馬二者能以琵琶
三絃合琴曲自云傳自白四郎 諸郎頗擅白下名曾厠天樂溷
咸英風謠遺意兼淫貞胡部樂曲笳管精金源絃索傳
汴京啾啾山雀彈白翎陰山敕勒餘悲崩悲崩蒙
古曲名 公子招
我開醪醑二三老輩尋鷗盟洋洋耳熱歌聲盈伊涼雜
曲兼幽并攏撥義甲紛鏗鉤珠璣百斛瑛盤傾左手右
手不可停清詞脫口機絲縈能令座客心屏營詩成一
笑森寒星音節不學琵琶行

虞永興帖

右軍筆法永興留褚薛名高未許儔誰謂圓機書一紙
房村纜換芋干頭

泰山磨厓碑四首

劫火焚餘華岳祠明皇手蹟惜殘碑曾觀海日登東岱

星斗摩抄夜半時

余癸未過華祠見玄宗碑
數十字無有榻者迴
憶壬午泰山觀日出時磨厓三丈文字猶可記也

飛梯絕壁捫奇字快事爭傳周侍郎櫟園
先生六十年來餘

搨本照人三文墨痕香

皇家書餘天璽年漢碑多泐孔林前北齊楷則誰摹得
最憶磁州高孝宣

北齊高孝宣墓碑字畫
古秀在磁州城南數里

穆王癸已移鄉校瘞鶴殘銘勒半山

吉日癸已碑縣尹移之學宮焦山瘞鶴銘太守移之

誰料泰山三丈石却隨烟墨落人間

偶以藏酒鵝炙餉朱太夫人承以次郊先生書筆

古硯見頌志謝一首東夔聲

鶴口磬御斷壁如一瓶博得換鵝書玉蟾清淚應頻滴

古硯頌來處士廬

煨芋戲作

曾記殘僧夜共煨十年心跡著寒灰龍香火煖三城炭

此夜遭逢歎芋魁

學師海棠膏

紅淚冰凝紫玉漿齋廚雋味許初嘗酸甜蜜意中邊徹
便是梅花聘海棠膏須梅汁乃成

夜檢復社錄感興四首東志山

白馬清流事後先空煩橫議攬朝權賢愚同盡滄桑劫

名氏區區七十年

錄中二千二百五十五人周鍾諸人亦與焉

東林黨禍此身輕異代誰能舉姓名記得申屠蟠一語

深防擁篲兆焚坑

南朝遺事歎弘光馬阮名污翰墨場何似穹碑書黨籍

千秋留得姓名香

頭白年年事汗青殘編掇拾對秋螢典型留得前人在

便是遺山野史亭

再游城南因贈永興融上人

江天積雨秋氣深晴光染就丹黃林城南萬木寫蒼秀
透迤澗谷同蕭森雨花一峰高嶇嶇天風吹衣寒駸駸
千山軒翥向鍾阜浮嵐冷碧侵冠襟江流巴蜀走萬里
興衰滿目歸消沉古墳翁仲夜相語山巔紫氣銷黃金
興劇尋僧娛晝永一菴松桂開雲岑义牙古梅足幽賞
露兄雲子供謳吟我來惜不及春月暗香疎影看瑶琳
空山日暮喧歸禽蒼苔落葉行松陰作歌贈汝清塵心

報恩寺塔

琉璃九級夜通明金碧重開眩目晴

塔遭火燬復修余三十年來復此遊也獨

步凌風最高頂危欄三匝少年情

安隱寺

拒霜花落水平池黃菊香兼晚桂枝
日暮僧歸山徑暝綠天深處試茶時

碧峰寺

松篁金碧遠毗連道行遺踪盛梵天
秋草殘碑尋廢寺更無人繼碧峰禪

能仁寺

不分梅雪與桃花霞開徧城南
寺寺花重到僧房秋日晚

虬姿老幹尚橫拏

贈金叟

少日風懷老不迷
懺除結習向闍黎
明燈佛座娛秋寺
清課蒲團徹曉雞
未出謝家投遠社
更無何肉有周妻
他年倘證聞思果
已悟禪心着絮泥

金陵晤蛟厓戶部
莪青少府感舊抒懷
贈詩四首

因寄澤孔令君

西州舊路卅年心
古調空餘爨下琴
故劍解來曾自昔
此莊荒後到于今
淮干判袂星霜改
江岸停橈歲月深
人事變遷多少恨
夜闌秋寺得招尋

憶點西巡侍從班
師門垂涕仰高山
起居白髮慈幃在
談笑烏衣子姓間
華屋空存人已歿
仙郎雖健我同閒
竭來風景南朝地
鳧舄追陪且未還

江海飄零絀壯圖
雲巖遊覽歷崎嶇
十年再會人俱老
萬里經行興未孤
是處好山看不厭
慰情生女勝如無
柳枝消息宜熊夢
奮發商瞿齒壯夫

仕譜游蹤併劇談
諸郎事業在江南
幾人共醉金陵酒
清夢偶同彌勒龕
桐汭扁舟問烟水
陵陽秋色望雲嵐
平生笠屐饒詩債
乘興他時我亦堪

贈六峰二首

五岳周游攬勝情青鞋布襪幾經行洞庭烟水芙蓉秀
黃海松雲組繡明南國素秋楓葉冷東臯紅雨杏花晴
買山應被巢由笑此日追蹤尚子平

知已曾言一旅棠贈君詩好最難忘行年六十身非老
滿目雲山興本狂幾處林塘供嘯傲平生忠信慎行藏
明年二月春尋路果老瓜疇是草堂

秋日偕鳴九諸子復游城南諸勝擬宿祖堂不果

歸登雲師來韻

城南山寺幽盤游如苑園籃輿出長干車馬兼風鬪萬
松蒼翠裏麗句懷僧畫蛟龍互攫拏挺拔含深秀英英

白雲海濯濯寒芳牖畫壁響飛濤鐵幹橫倉籀

宋二水臣
畫松濤鹿

澗最
工妙香飯寄禪窟未笑蔬笋謬茲來日移午南向窮巖

岫逍遙六朝僧彷彿林泉邁摳衣試芒屨登頓狎羣狄
高峰聳老捩雙闕鑿石竇千山競勾帶磅礪森締構秋
色映江光涼飈殊節候一笠翼新亭衆木撐瘦皺舒嘯
俯千仞回首生眩瞽今古幾涕洟流峙自高厚轉恨西
日晚景物多遺漏腰脚不辭頑勝賞寧嫌又欲訪獻花
巖烟靄迷巾袖揮手謝嬾融林外鯨牢扣

後期二首

玉珮明珠訂後期目成珍重記微詞無端一夜淋浪雨

虛負蘭閨設悅時

秋水明霞照玉蓉此時再見勝初逢
臺鸞影分明見

粉汗香羅透一重

題學陶照二首

風格亭亭遺世人影形詩在與傳神
照上自寫淵明形神飲酒諸詩不須更

擬添蛇足強為泉明作後身

與我周旋寧作我安能僕僕學他人東籬黃菊盈尊酒

但醉休論影與神

酬又函二首步元韻

清秋巖壑縱躋攀看遍江乘表裏山自弄白雲娛暇日

休論青瑣溷朝班烟嵐戀賞真成癖喬固虛名好是閒

經術湛深詩筆老訂交寒月酒杯間

絕學韋編擅道南質疑此日更停驂化書每笑齊丘誕

高論真聞輔嗣談
時以易解相質斂器片言君自道假年卒業我

猶堪吟風弄月歸來興欲和新詩愧出藍

同年生徐冠山篤於行誼以里中公事忤墨吏銜

之百端幾瀕于危然為清流所附卒以得免今

將謁選人遇之白下因贈二詩

有道從教學塾巾傳聞危行事全真桓碑一片懲封虎

太學三千訟黨人鱗鬣半摧釜底劫頭顱無恙溺中身

此行不用稱張祿長嘯單車徑入秦
鬢髮無情竟染霜功名誰更論文章顧厨且是宗元禮
粉墨居然嫁孟光舊會永和忘歲月新猷大邑慎行藏
弓蛇舊事君猶凜卓魯風規許抗行

送家弟返舍

送君江上去正及早潮平殘月白沙影寒霜小雁聲僧
樓聯榻夜客路買山行一水淮南郡歸帆計日程

題黃研芝宮允黃山采芝卷

我初未作黃山游興來每作黃山詩披圖彷彿曾夢到
臥遊宗炳真吾師何人翩翩此采芝神光五色絢雲海

三十六峰紛葳蕤玉堂名彥冰玉姿掉臂肯與軒裳辭
振衣長嘯入崖谷容成赤松相娛嬉古來真仙故不死
世人肉眼安能知我生也復有仙骨餐松飲澗行相追
長鏡白木鬪山雪皮蓬天海從所之惜哉塵鞅未擺脫
雲霄矯首空嗟咨先生姓字埒園綺商顏羽翼非其誰
世無留侯且高隱漢庭往事今難爲

武丹畫松歌

金陵名園陳朝松天矯何人能畫得精銅膚坼土花斑
磔蝟毛森螺黛色此樹荒涼閱人代烟景迷離饒大塊
三品巋然笑石公秦封幸不污東岱朝來紙上看畫松

畫松乃與真松同一株低偃一株直爭高作勢蒼烟籠
海內名松亦有數曾見華山三兩樹黃山最數軒轅峰
世間衆木皆兒童武君畫筆爭雄長翠染雲嵐迷疊嶂
吾家兩幅一通靈飛去渾如葛陂杖邇來好手更無人
畢宏韋偃誰前身萬松菴畔十丈壁老幹扶疎一宋臣
讀程翰林從亡錄

點蒼萬里衲僧衣老矣王孫更北歸四十年來從難意
鷓鴣終遣向南飛

建文北歸後程
公仍返雲南

閱點將錄

宮鄰閹黨事難言獄上呼囚不洗冤讀史心傷東漢事

李膺賈禍是龍門

讀天發神讖碑

丹書符命止虛言公路當塗竟豈然神讖空煩報天顛
洛中青蓋又何年

讀酌中志

故事能諳劉若愚名標逆案故難除獄中撫拾書空在
閹宦何曾使讀書

題僧樓壁

好夢驚回夜未央題詩空記已公房雲山極目人千里
烟水相思書幾行漏永蓮尊消樺燭天寒玉帶寄禪牀

春風桃花含笑更上西樓醉幾場

歸舟

水碧山青繫客情一帆寒雨蘆歸程龍江權使休相問
依舊蓮舟一葉輕

舟夜

風色初寒雨意昏石城橋外水烟痕歸舟但載書千卷
別恨難消酒一尊月冷僧樓孤夢迴潮生江岸濕雲屯
朝來便是南徐路回首依依白下門

白壁二首

白壁初求向玉田藍橋水淺締良緣石城艇子安雙槳

不欠黃姑下聘錢

北固山前趁早潮江天細雨濕蘭橈莫愁門巷休回首
離思依依付柳條

雨泊

暮雨瀟瀟入漏天寒雲疎樹暗江烟鄰鉦莫遣驚栖鶻
夢破孤衾不得眠

夜分

海月團團對酒卮夜分孤艇獨眠時都將水碧山青恨
說向西齋剪燭時

汪貞女有序

貞女汪氏幼聘馬生生病歿女誓死守翁姑憐之迎以歸疏食布衣獨居一室以老士大夫爲詩歌榮之李君元臣以請因有是作

我聞天地有正氣往往得之巾幗間卓哉貞女以死守
慷慨詎比從容難信國檻車五千里蘇武吞羶二十年
區區女子閨閣中遙遙百歲何其艱長齋繡佛閉一室
老死不識夫君顏行誼有此風末俗烏頭綽楔光門闌
閭里豔說貞女賢作詩爲繼柏舟篇

有寄

紅燭清尊豔曲終西齋繡被幾人同異時辜負山堂約
又是蕪城客恨中

寄家

畫船孤夢雨瀟瀟人在揚州廿四橋十幅布帆三百里
歸心早晚托寒潮

戲示元臣開西四首兼柬高亭

夢到臨冰語未通真諧游記立談中鏡臺中壘還相笑
此事寧當君有功

狡獪先探半面春音塵彷彿記來真凝妝却扇蘭舟夜
紅燭嬌羞避外人

醜黑何當笑孟光些些荆布嫁衣裳如何待闕鴛鴦社
十日經營累小郎

豔冶齊姜比食魚金釵列屋喜安居老夫自詫平生福

已說猶憐有報書

齊梁體四首

碧玉內家女桃葉石城姬何以結綢繆翠翹金縷衣
蓮簪百寶裝充耳明月璫下裳織鮫綃雜珮綴珩璜
九子鳳皇釵百琲弓樣鞋香霧銀燈裏伊人打槳來
蒹葭曾倚玉鸞鷺亦棲梧要叶熊羆夢從教晒老奴

歸舟聽雨二首

北風吹雨暗蕪城又阻歸舟一日程耿耿故園兒女意
玉釵紅燭聽分明

暖極初聞雨風鳴漸覺寒著篷成響劇到枕得眠難舊

府僧樓聽青溪水榭看揚州歌管地容易五更闌

曉發至召伯

寒逼西風曉村村起燒烟雁聲低拂水湖氣遠浮天河
濁隱鄉樹隄長聚客船頻年數來往生計更茫然

送徐亮直太史奉使琉球六首

萬里長風萬里船此行真箇是登仙九霄玉節星辰正
一品麟衣袞繡全丹服島彝天所庇絲綸異命使
乎賢浮槎未羨銀潢近計日看君到日邊

鼓山極目大琉球鼉嶼雲帆浩不收珠斗芒寒天北極
鮫宮氣壯水西流職方縱覽寰瀛盡禹跡微茫貢道留

我亦釣鰲投轄客乘桴空自傲滄洲

漠漠齊烟暗九區親從裨海辨方輿梯航玉帛歸中夏
風汎方壺接太虛驅石每嗤秦政誕射魚曾笑武皇疎
詞臣此日銜天語歸橐多求異域書

寒風颯颯水烟昏測水占風奉一尊要使藩封明孝治
真從信使拜君恩海隅城郭羅蠻國日出山河附大
坤琛貝儘教番舶獻輕舟載石素絲存

坐按山經與水經東南考徧外洋形扶桑擁日天門赤
龍伯迎舟海霧腥兩道墨輪容黑子一冬雪片蕩青冥
天吳海若波濤息應有新編奏闕庭

山海樓高屹海濬天邊海腹望曾真

昔人望海詩有海腹天邊兩墨輪之句每歎其奇丙

子登山海東樓以望良然

垂雲鳥化風無際奠地魚掀浪有神舟過蓬萊

凌弱水詩成鯨背快文人揚帆三月歸朝早好向輶車
問使臣

和人二首

繡被濃香夢不成蘭舟兩度止虛行金牛水驛閉松月
酒暖燈紅獨夜情

孤夢依依冷月輝風蓬雨棹且東歸石城城下春潮水
為送鴛鴦一處飛

江左十月多雷雨梅杏諸樹皆花秦隴地大震江

浙淮右大風蛟龍爲災

南國九秋雨江天十月雷蛟龍起山澤梅杏豔樓臺地
軸翻秦甸風輪沒海隈年豐看奏牘水旱不爲災

至日雷雨

寒夜兼風雨雷霆動滿盈陰凝還日至氣洩念陽生后
土沾全濕天樞撼未平淋浪朝復暮愁絕杞人情

冬夜得西澗都憲書感興代柬四十二韻

舊有虞山約蹉跎白日徂三峰寒翠渺十月雪霜渝林
迴丹楓落泉凝拂水枯思君頻得夢望遠當登艫往歲
隨飄梗居然狎泛鳧停船逢舊雨醜酒醉東吳水冷胥

江月歌長虎阜歛貌驚衰相老詩愛謝家腴蕙直難諧
俗名言每破愚學恒嗤粉飾行必礪廉隅傀儡憎牽線
蚩冷笑刻符未妨人唾棄一任鬼揶揄種玉聯雙珏求
凰卜九雛鏡臺人比嶠錦字姓爲蘇豈惜江臯珮真消
石氏珠畫圖呼錯莫冰語聽含餉世故成盤謬離心費
鬱紆三年遲德曜四十過商瞿此日來雙鯉關心自遠
塗開緘如覲面感興軫長吁忽忽時將晚悠悠計總迂
謀生慚用拙奮志恥爲儒萬卷窺從破三冬用不敷勳
名終樹否述作定傳無枉謂肝凝鐵焉知玉是砮市門
棲漢福博士隱秦盧蹭蹬憑青簡飄蕭任白鬢窮年疲

道路卒歲滯江湖誓墓明人子吟詩自老夫深懷到朋
友暮景念桑榆嬾漫淹中婦因循悞小姑湖兒撫安石
玄草與童烏作健從江左佳人得舊都黃姑成聘禮桃
葉載歸船草紉宜男佩花明沒骨圖柔鄉諳治習壯氣
寄清娛兒女關身事乾坤付廟謨風雲期弗會烟水道
猶孤疑戰羣陰結初陽一畫懦天心怒雷雨地力困葭
莩人事誰能料書生那可扶醉吟呵凍管搔首向洪鑪

清水潭曉發

湖陂開曉鏡一色淨冰天極岸明沙鳥空林起突烟臺
荒沽酒路浦冷釣魚船記取停處當鑪笑數錢

江舟早發

殘雪瓜洲路歸潮午夜聲寒山籠霧瘦霜月照人清雁
陣驚初起漁燈遠尚明金焦定何處隔岸曉鐘鳴

圍碁和蒿亭韻

楸枰世所耽賈勇作其興白黑起爭端生死力相競對
局成坐隱息心生靜境機捷神以行氣斂目為瞪旁觀
急意授深入頻探偵勢均京索塵術詭張蘇橫勅敵埒
齊秦強援求晉鄭摧鋒挫前矛救敗留後勁偏師搗其
虛夜繼巴山磴窮寇窘其歸左陷陰陵弃或增壘滅竈
或拔幟破甑數演河洛圖銳入匈奴棚孳孳雞伏卵兀

兀船下碇終日肯言倦萬事悉可屏詫勝喜發顛諱輸
僵不瞑瀛塵橘叟筭圓方小友詠三敗非及韓七縱詎
擒孟射鵠喻誨學擔糞入譏評奕以寓兵戰癖乃為疾
病賡詩戒沒溺棄於墻角檠

題棣園學使谿翁濯足圖

振衣軒轅峰濯足硃砂泉放浪雲海中猿鶴相後先人
言汪使君舊是黃山仙游戲翰墨場名字落人間文章
燦國華五色麗雲烟掉頭謝軒冕復此山中眠芒鞋踏
蒼蘚舒嘯蓮峰巔容成與赤松揖讓相差肩何人貌此
圖風骨殊倏然鬚眉想彥回笠屐疑蘇髯團扇畫放翁
屏風寫香山他時華表歸化鶴應千年

江上四首

挂帆每怪江行速瞥眼千峰紫翠間竟日南風送輕暖
披裘緩看雪中山

玉龍千尺自蟠拏巖壑迷離映日華多耳芒鞋方竹杖
徑須鶴氅上棲霞

竹兜軋軋京江路記得龍潭冒雪行一葉寒潮風日好
江山如畫八年情

接天冰霰冷雲封何處蒼茫北顧峰落日觀音巖下路
今宵穩聽寺樓鐘

仿香奩體四首

山眉雲髻九回香百寶流蘇映靚妝
謙畏着人風格遠
夜深移燭細端相

暗哂司空見未真鳴璫緩解小腰身
不因紅酒封嬌面
竟夕難親禮義人

紫玉釵頭顫九雛小年初涉愛迷途
莫煩閉目成羞澀
風味寧須怯老夫

此際祥應說夢蘭九枝燈影夜初闌
有人極目高樓月
坐對三星玉臂寒

香奩二首

畫裏凝妝鏡裏身燈前豔色帳中人
風懷近遠憐嬌小
神采陰陽斂笑顰眉案羹湯三日味
膽瓶梅萼一枝春
榻來暖老思燕玉管領柔鄉興味新

金屋嬌多祇閉藏愛迷滋味已頻嘗
夢迴鴛枕時呼母
醉倚銀瓶更怯郎夜雪添香翻活火
曉奩呵手試新妝
畫眉可得煩京兆粉墨妖妍笑孟光

梅花詞十首和玉禾

暗轉陽和春意深梅花凝蠟色如金
挽回天地嚴凝氣
冰壑祈寒見素心

一樹潛偷江上春眼明賺煞涉江人
藏春別有寒香塢

風霰何人解問津

萬樹空山釀白雲香光雪氣共氛氲不須更憶羅浮夢
林際春深獨似君

丰韻渾宜霰雪和玉塵千斛總緣他天公愛種梅花樹
歲歲年年落葉多

不須愁雨况愁風瘦硬枝宜臘雪封二十四番寒較劇
先春領略萬花叢

橫斜弄影一奩閒清夜無言浣玉顏記得孤山段橋外
冷香如夢鶴飛還

暗香深處一枝斜漠漠輕烟淡着花此夕朦朧添月影

橫陳玉體映纖紗

玉質誰教學豔妝深紅掩白未相妨壽陽睡起朝酣酒
笑對南枝絳雪香

一番寒雨潤枯荂活玉添肥映綠苔驢背高吟風雪興
未妨霑濕討春來

水暖銅瓶養瘦枝香清肺腑夢回時等閒引惹消魂句
誰道梅花不要詩

臘月牡丹

一朵偏居萬卉先冬榮桃李敢爭妍名高姚魏初無匹
品壓錢劉未入箋買費兼金知不惜開非勝地得轟傳

空山梅萼方含笑正是風雲釀雪天

志山以青梅春釀方見東又系佳句和韻奉答

不羨珍珠溜小槽西涼一斛薄葡萄封先霉雨寒生醖
沁合糖霜不勞露浥金莖清入肺香兼梅實當舖糟
坡翁舊譜誇真一麩米空煩索價高

雪霽城南即事

青山南郭弄晴晨蠟屐泥融訪隱淪梅欲放花仍壓雪

牛初搏工待迎春

他郡迎春東郊金陵獨在城南兩
花臺前土牛卓立後二日迎春也

饌分香積鳴

鐘後水暖蘭湯試浴新興盡不逢安道去歸途寒月白
於銀

雪夜

準擬還家做好春淹留遲暮此傷神接天風雪簾櫳晚
知對燈花卜遠人

風雪

風雪應憐歲宴寒幾年深室飽艱難已知不死關天意
誰識多才是禍端珍膳未渝嘗膽志豐貂祇作履霜看
門舊事雞鳴候悵望孤懸一寸丹

江干雪夜

石尤風急阻行舟滕六飛花且滯留遠岫堆鹽生夜白
凍雲凝墨傷城流金鉦寂寂山頭戍玉笛悠悠水上樓

此夕故園兒女意櫻心歸路迴關愁

江上大雪連日夕不止疊前韻

定定難開江上舟此行隨事得稽留雪饕欲壓孤篷折
風厲頻驅斷港流幾夜夢歸仍野岸多時吟望尚山樓
觥船鶴氅生高興銀海茫茫入旅愁

燕子磯阻雪同實堅茂才疊前韻

燕子磯前又泊舟羈人真作賈湖留山排玉樹行相引
江淨銀沙凍不流雲暗遠天迷鳥道風吹急雪掩僧樓
孤亭徙倚不歸去薄暮吟詩消客愁

又雪東實堅

臥聽驚飈蕩曉舟江干拚得此年留打窗凍雪添新響
撼枕寒溪疑去淺流乘興剡源難命駕思家楚客怕登
樓殊鄉歲宴真無緒兀對寒山詠四愁

雪中遣興再示實堅三十二韻

石城連夜雪積素失朝暾嶺樹明先曉船衾擁不溫開
窗撲眉睫拂席舞盤殮竟日天花落臨波鷺羽翻因風
疑起絮作雨定傾盆峰失盧龍峻即獅子山江翻白帝奔退飛
迷衆鳥拜浪沸孤豚偃側松垂蓋摧頽柳受髡人蹤希
野渡帆影斷天門信宿仍山郭眠餐傷水村農祥徵尺
瑞客路改春暄臘盡添餘潤潮生掩舊痕鐘鳴何處寺

堞暗幾重閣雲重低歸雁林疎冷斷猿崢嶸臨歲晚搖
兀得心煩縮角蝸藏殼埋頭蝨處禪三晨起全嬾一飽
腹頻捫悶想還家夢吟銷送別魂老年兒女戀文字友
朋敦節序懷鄉俗鵠原念季昆生涯付烟水否泰問乾
坤戰伐驕羌羯烽烟接塞垣馬駝遲轉餉珠桂急黎元
玉節勞子宵衣履至尊絮袍淹薊闕鐵馬臥崑崙
水旱天心軫災祥劫數屯三辰同沒溺十日苦偏反枕
警衝颺吼舟防駭浪吞不眠如守歲枯坐似忘言燭跋
更籌靜天寒野岸昏書慵探故紙酒厭引殘樽自索梅
花笑閱情與婦論

江上雪深數尺借實堅再登燕子磯放歌用阮亭
先生集中鑿江詩韻

乾坤一雪同滉漾每上空亭心目朗鷺毳紛紛拂不開
卵石爭飛劇於掌尋常愛攬江天勝留滯翻成物外賞
舟人漁子蝸縮角埋沒林塘况烟榜巖壑無聲鳴鳥絕
劃焉長嘯千山響雨珠雨玉天好奇崑峰表裏橫千丈
興來直欲御罡風歲宴懷歸心獨往天吳遁匿蛟蜃蟄
十日不見寒潮長欲去未能且取醉臨風耳熱歌以慷
人生行止故難料此間安坐非鹵莽君不見少日弓刀
馳塞北刻骨鐫肌風颯爽寒夜沙場雪打圍冰天何處

求平壤髀肉只今悲老大貂裘鶴氅從吾黨晚鐘漠漠
下山情屐齒齟齬折其兩

除夕前一日雪中再疊韻二首

尺寸難移臥壑舟江山有意重勾留翠微全掩千重碧
瀕洞平消萬里流悶擁黑貂眯望眼狂呼紅友上高樓
小除風味君須領莫爲言愁也欲愁

不隨埋沒扁舟如此心情十日留龍戰那知天地意
星迴一任歲華流雨珠雨玉供茶鼎無酒無花倚舵樓
記取觀音山外路吟詩餞臘畔牢愁

除夕雪止發舟疊韻先寄廣陵家弟二首

西風纔轉便移舟萬頃茫如不可留止有雁鴻皆北嚮
依然江水自東流多情雪壑開圖畫回首山城失戍樓
重數歸期成一笑蕪城春酒不須愁

挂帆晴色入輕舟逸興還思宿處留風捲暮雲千嶂出
雲消春水一江流冰堅舊港回青翰夢醒新洲冷玉樓
爲報山堂多置酒歲朝歸到浣羈愁

瓜洲守歲六首

邗江冰合阻歸歟此夕心驚一歲除多謝江神留客意
扁舟安坐亦吾廬

坐聽鄰船爆竹聲一杯相勸旅人情綠窗兒女關心處

紅燭清尊筭客程

莫因佳節苦思歸把酒圍爐達曙暉不見玉門征戍客
鐵衣風霰臥金微

沙棠穩載秣陵春活玉生香照眼新今夕江津更何夕
燈明酒暖對春人

緩斟柏葉酬佳節學製椒花頌小妻身是伯鸞江海客
真煩食案與眉齊

風雪茫茫獨坐情江津夜靜不聞鉦與酣起作燈前舞
始信鳴雞非惡聲

